

**BOSNA I HERCEGOVINA
FEDERACIJA BOSNE I HERCEGOVINE
ZENIČKO – DOBOJSKI KANTON
KANTONALNO TUŽILAŠTVO
ZENIČKO – DOBOJSKOG KANTONA**

Broj: T04 0 KTK 0055069 23
Zenica, 31.10.2025. godine

**OPĆINSKI SUD U VISOKOM
VISOKO**

Na osnovu člana 45. stav 1. i 2. tačka i) i člana 241. stav 1. Zakona o krivičnom postupku Federacije Bosne i Hercegovine (ZKP F BiH), podižem,

OPTUŽNICU

Protiv:

J. S., osuđivan,

Što je:

U periodu od sredine decembra 2021.godine pa do 14.03.2022. godine u B. kao odgovorna osoba u svojstvu medicinskog tehničara-sanitarni tehničar u po zaključenom ugovoru o radu broj ... od 31.12.2020. godine zaključen između njega i navedene JU, čija su ovlaštenja propisana Sistematizacijom radnih mjesta koja je sastavni dio Pravilnika o radu navedene ustanove broj ... od 28.07.2017. godine i to u dijelu VI pod tačkom 3. u kojoj je propisano da, između ostalog, vodi evidencije oboljenja, prati i poučava higijensko epidemiološke uslove, izrađuje analizu izvještaja i informacija o kretanju zaraznih bolesti, daje vakcine, a po prirodi posla vrši izdavanje potvrda o izvršenim uslugama, s ciljem pribavljanja koristi za drugog, iskoristio svoja službena ovlaštenja naprijed navedena, te postupio suprotno interesima službe, na način da je:

1. na osnovu generalijskih podataka koje mu je, putem mobilnog telefona prosljeđivao Z. A. i to za lica T. E., F. T., T.L., S. A., Š. A., te H. M. i I., tako što je, zahvaljujući pristupu sistemu koji je imao u navedenom svojstvu, unio neistinite podatke u službene knjige „Protokol bolesnika Covid vakcinacija“ da su navedena lica primila vakcine protiv Covid-19 i to obje doze, na koji opisani način im je pribavio korist u vidu izdatih Covid-potvrda da su vakcinisani protiv Covid-19 bolesti, a koje potvrde su im služile za prelazak državne granice, iako je znao i bio svjestan da navedena lica nisu primila vakcine, te da u službene evidencije unosi netačne podatke, što je i htio,
2. dana 18.03.2022. godine, nakon što je od B. M. korisnika telefonskog broja ..., putem Viber aplikacije, zaprimio poruke sa sadržajem ličnih podataka na ime B. M., B. M. i B. A., zahvaljujući pristupu sistemu koji je imao u navedenom svojstvu, unio neistinite podatke u službene knjige „Evidencija o zaraznim bolestima“, tako što je evidentirao da su navedena lica „negativna“ na Covid-19 testu, te im izdao potvrde o navodno obavljenim testiranjima na Covid 19, iako je znao i bio svjestan da navedena lica nije podvrgnuo antigenskom testu, te da je izdao potvrde a lažnim podacima, što je i htio, na koji način im je pribavio korist u vidu izdatih

potvrda o negativnom testu na prisustvo virusa Covid-19, što je i htio, a koje potvrde su im služile za prelazak državne granice,

3. dana 24.02.2022.godine, nakon obavljenog usmenog razgovora sa H. K., koji mu je tražio uslugu za sina H. F., da mu izda potvrdu o izvršenoj vakcinaciji sa obje doze vakcine protiv Covid-19, to i učinio, zahvaljujući pristupu sistemu koje je imao u navedenom svojstvu, tako što je, u službene evidencije „Protokol bolesnika“ unio netačan podatak da je H. F. vakcinisan, o čemu je imenovanom izdao i potvrdu o izvršenoj vakcinaciji, iako je znao i bio svjestan da imenovani nije primio vakcine, te da u službene evidencije unosi netačne podatke, što je i htio, na koji opisani način je pribavio korist H. F. u vidu izdate Covid-potvrde da je vakcinisani protiv Covid-19 bolesti, a koja potvrda mu je služila za prelazak državne granice,

Čime je počinio produženo krivično djelo zloupotreba položaja ili ovlašćenja iz člana 383. stav 1. Krivičnog zakona Federacije Bosne i Hercegovine u vezi sa članom 55. KZ FBiH.